

von Wulf Wager

## Pizzakrematorium



Mir hend a nuie Kiche kriagt. Drei Wocha hot dr Ombau durat. Zwoi drvo hemmr ons en da Urlaub zrückzoga ond oine hemmr laif miterlebt. Über des was mit de Handwerker so glaufa isch, schreib i koi Kolumne, des geit a ganz Buach!

Nadierlich hemmr au en nuia Backofa kriagt. An solche Geräte soll mr jo net spara, denn an dene hot mr jo lang. Onser alde Kiche war scho dreißg Johr alt.

Also hemmr an selbschtreinigenda Backofa bschdellt mit sogenannter Pyrolyse-Funktion. Dodrbei wird dr Backofa bis auf über 500 Grad ufghoizt. Logischerweise verbrennt aller Dreck bei dene hohe Temperatura. Die Pyrolyse isch an dr Armatur durch a P mit ma kleina Flämmle kennzeichnet. Es gibt aber au a Pizzataschte, die mit ma P kennzeichnet ischt, allerdings ohne des kloine Flämmle.


Jetzt hen mei Frau on i voller Fraid a guade Vollkornpizza selber gmacht on mit lauter frischem Gmias ond guade Zutata belegt. Wo mr se en da Ofa gschoba hend, han i die P-Taschte druckt. Dommerweis die Falsche. Jetzt hot der Ofa aber a Sicherheitsfunktion. Ab ra bestimmta Temperatur schließt der Ofa bei der Pyrolyse de Tür ond du kriagsch se nemme uf.

Wo mir gmerkt hend, dass mr die falsche P-Taschte druckt hend, war's z'pät. Mit hängende Lefza ond traurige Auga hemmr zuagucka miass, wia onser guade, xonde, selbergmachte Pizza vollständig verbrennt ond am Schluss bloß no a Häufle Asche übrig blieba ischt. Do isch mr der Spruch eigfalla: "Mit dr Dommheit, do isch's so: Mr selber merkt do nix drvo. Aber Gscheithheit isch dia Lischt, dass mr merkt wia domm mr ischt.

Bis näggschd Woch'

Ihr

Wulf Wager



Alle Kolumna zom Nochlesa onder: [www.woascht.de](http://www.woascht.de) oder em facebook em Wulf Wager Fanclub